

04 FEB 1999

MALAYSIA-KEMBOJA

M'SIA DAN KEMBOJA TANDATANGANI PERJANJIAN PERLUAS HUBUNGAN DAGANGAN DAN EKONOMI

KUALA LUMPUR, 4 Feb (Bernama) -- Malaysia dan Kemboja hari ini menandatangani satu perjanjian perdagangan yang akan menyaksikan peluasan dan peningkatan hubungan perdagangan, ekonomi dan industri antara kedua-dua negara.

Kerajaan kedua-dua negara bersetuju untuk mengadakan bantuan yang perlu dan menggalakkan perusahaan-perusahaan swasta meneroka peluang-peluang perdagangan, demikian menurut satu kenyataan yang dikeluarkan oleh Kementerian Perdagangan Antarabangsa dan Industri di sini hari ini.

Perjanjian tersebut akan memudahkan perkembangan perdagangan dengan memberikan layanan negara paling diutamakan kepada satu sama lain dalam perkara-perkara berhubung tarif kastam, cukai, caj dan prosedur kastam dari segi import dan eksport barangan.

Selain itu, perjanjian tersebut akan memudahkan penyertaan kedua-dua negara dalam pameran-pameran perdagangan termasuk pengecualian duti kastam dan caj-caj lain yang serupa ke atas barangan dan sampel untuk pameran dan pertunjukan.

Ini juga akan menghasilkan penubuhan jawatankuasa perdagangan bersama bagi membincangkan langkah-langkah untuk mempertingkatkan dagangan dua hala, jelas MITI.

Perjanjian ini telah ditandatangani oleh Datuk Seri Rafidah Aziz, Menteri Perdagangan Antarabangsa dan Industri bagi pihak kerajaan Malaysia manakala Encik Cham Prasad, Menteri Perdagangan Kemboja menandatangani bagi pihak negaranya.

Upacara pemeteraian perjanjian ini telah disaksikan oleh Perdana Menteri Datuk Seri Dr Mahathir Mohamad dan rakan sejawatan Kembojanya Samdech Hun Sen.

Nilai dagangan dua hala Malaysia dengan Kemboja berjumlah RM326.8 juta pada tahun 1997 dan RM175.4 juta bagi tempoh Januari hingga November, 1998.

Pelaburan Malaysia di Kemboja sehingga Disember 1998 berjumlah RM1.7 bilion atau 31 peratus jumlah pelaburan langsung asing di Kemboja, dalam bidang pembangunan prasarana, penjana kuasa, pelancongan, perbankan, pembangunan harta, penapisan minyak, pendidikan dan telekomunikasi.

-- BERNAMA

AD KY MA